

დამოუკიდებელ სახელმწიფოთა თანამეგობრობის წევრი სახელმწიფოების მეთაურთა საბჭოს **გადაწყვეტილება აფხაზეთის, საქართველო, კონფლიქტის მოწესრიგების დამატებით ღონისძიებათა შესახებ** დამოუკიდებელ სახელმწიფოთა თანამეგობრობის წევრი სახელმწიფოების მეთაურთა საბჭო, ხაზს უსვამს, რომ უცვლელად აღიარებს საქართველოს სუვერენიტეტს, ტერიტორიულ მთლიანობას,

მიესალმება ქართულ და აფხაზურ მხარეთა პირდაპირი ორმხრივი მოლაპარაკებების განახლებას და ამ პროცესისადმი რუსეთის ფედერაციის აქტიურ ხელშეწყობას, უკრაინის მიერ გაეროს გენერალური ასამბლეის 52-ე სესიაზე წარმოდგენილ ინიციატივას გააქტიუროს თავისი მონაწილეობა აფხაზეთის, საქართველო, კონფლიქტის მოწესრიგებაში,

აღნიშნავს რუსეთის ფედერაციის, როგორც ხელშემწყობი მხარის, ეუთოსა და “გაეროს გენერალური მდივნის მეგობართა ჯგუფში” შემავალ სახელმწიფოთა წარმომადგენლების თანდასწრებით ქართულ და აფხაზურ მხარეთა შეხვედრების მნიშვნელობას, საკოორდინაციო საბჭოსა და მისი სამუშაო ჯგუფების ფუნქციონირების დაწყებას,

ხელმძღვანელობს დამოუკიდებელ სახელმწიფოთა თანამეგობრობაში მშვიდობისა და სტაბილურობის უზრუნველყოფის შესახებ მემორანდუმის (ალმათი, 1995 წლის 10 თებერვალი), კავკასიაში სტაბილურობის უზრუნველყოფის უმნიშვნელოვანესი პირობის – სეპარატიზმის საფრთხის აღკვეთისა და ამ რეგიონში კონფლიქტის მოწესრიგების შესახებ თანამეგობრობის სახელმწიფოთა მეთაურების საბჭოს განცხადების (მინსკი, 1995 წლის 26 მაისი) დებულებებით, ადასტურებს თავის ადრინდელ – 1996 წლის 19 იანვრის, 1997 წლის 28 მარტის გადაწყვეტილებებს, რომელთა მიზანია აფხაზეთში, საქართველო, სრულმასშტაბიანი პოლიტიკური მოწესრიგების მიღწევა, და ხაზს უსვამს მათი შესრულების აუცილებლობას,

კვლავ გამოხატავს სერიოზულ შეშფოთებას იმასთან დაკავშირებით, რომ თანამეგობრობის ფარგლებში ადრე მიღებულ მთელ რიგ გადაწყვეტილებათა შეუსრულებლობის გამო ჯერაც არ დაწყებულა ლტოლვილთა ორგანიზებული დაბრუნების პროცესი,

შეშფოთებით აღნიშნავს, რომ კონფლიქტში აფხაზეთის მხარის არაკონსტრუქციული პოზიციის გამო აფხაზეთის, საქართველო, პოლიტიკური სტატუსის განსაზღვრასთან დაკავშირებული მოლაპარაკებანი შეფერხებულია,

გამოხატავს სერიოზულ შეშფოთებას აფხაზეთში, საქართველო, ეგრეთ წოდებული ადგილობრივი თვითმმართველობის ორგანოების არჩევნების გამართვასთან დაკავშირებით, რომლებიც არ შეიძლება ლეგიტიმურად ჩაითვალოს პირობებში, როცა არ არის განსაზღვრული ლტოლვილთა და ადგილნაცვალ პირთა დაბრუნების პრობლემა, რამაც ობიექტურად გამოიწვია კონფლიქტის ზონაში სიტუაციის გამწვავება, გაართულა მისი სრულმასშტაბიანი მოწესრიგების მიღწევა,

შეშფოთებით აღნიშნავს, რომ კონფლიქტის ზონაში გაფართოვდა დივერსიულ-ტერორისტული საქმიანობის, კოლექტიური სამშვიდობო ძალების სამხედრო მოსამსახურეებისა და საქართველოში გაეროს მეთვალყურეობის მისიის თანამშრომლების მძევლად აყვანის, ძალადობის სხვა ისეთი აქტების მასშტაბი, რომელთა მსხვერპლი ხდება მშვიდობიანი მოსახლეობა, ლტოლვილები და ადგილნაცვალი პირები,

ხაზს უსვამს თანამეგობრობის სახელმწიფოთა მეთაურების საბჭოს 1997 წლის 28 მარტის გადაწყვეტილებით გათვალისწინებულ ღონისძიებათა დაუყოვნებლივ განხორციელების აუცილებლობას, რაც უზრუნველყოფს ლტოლვილებისა და ადგილნაცვალი პირების ორგანიზებული დაბრუნების პროცესის დაწყებას,

გადაწყვეტა:

1. გააგრძელოს მხარეთა თანხმობით აფხაზეთის, საქართველო, კონფლიქტის ზონაში მშვიდობის შენარჩუნების კოლექტიური ძალების ყოფნის ვადა 1998 წლის 31 ივლისამდე ან იმ დრომდე, როცა კონფლიქტის მონაწილე ერთ-ერთი მხარე, მიიჩნევს რა, რომ არ სრულდება ამ გადაწყვეტილების დებულებები, მოითხოვს ოპერაციის შეწყვეტას.

2. დაუშვებლად მიიჩნიოს აფხაზეთის მთელ ტერიტორიაზე ლტოლვილებისა და ადგილნაცვალი პირების ორგანიზებული დაბრუნების პროცესის შემდგომი გაჭიანურება, დაბეჯითებით მოითხოვოს გალის რაიონში (ძველ საზღვრებში) ლტოლვილებისა და ადგილნაცვალი პირების ორგანიზებული

ლი დაბრუნების დაწყება და მათი დაბრუნების დამთავრება 1998 წლის დამლევამდე მხარეების, რუსეთის ფედერაციისა და გაეროს ლტოლვილების საქმეთა უმაღლესი კომისარიატის სამმართველოს წარმომადგენელთა მიერ შემუშავებული მექანიზმების საფუძველზე.

მხოლოდ ლტოლვილებისა და ადგილნაცვალი პირების შეუფერხებელი ორგანიზებული დაბრუნების პროცესთან, უწინარეს ყოვლისა, გალის რაიონში (ძველ საზღვრებში), უშუალო პირდაპირი დაკავშირების პირობით განხორციელდეს რეგიონის ეკონომიკური აღდგენის ღონისძიებანი და სასაზღვრო და საბაჟო რეჟიმის ნორმალიზება.

დაბეჯითებით ურჩიოს კონფლიქტის მონაწილე მხარეებს განიხილონ და გადაწყვიტონ გალის რაიონში (ძველ საზღვრებში) ლტოლვილთა დაბრუნებისა და ცხოვრების სრული ნორმალიზაციის ეტაპზე დროებითი გარდამავალი ადმინისტრაციის შექმნის საკითხი, რომელიც შუამავლების, გაეროსა და ეუთოს უშუალო მონაწილეობით იმუშავებს.

3. მშვიდობის შენარჩუნების კოლექტიური ძალების სარდლობამ მხარეებთან ურთიერთქმედებით უზრუნველყოს თანამეგობრობის სახელმწიფოთა მეთაურების საბჭოს 1997 წლის 28 მარტის გადაწყვეტილებით გათვალისწინებული ღონისძიებების განხორციელება.

ერთი თვის ვადაში კონფლიქტის მონაწილე მხარეების მიერ შემუშავებული მექანიზმის საფუძველზე დასახონ მშვიდობის შენარჩუნების კოლექტიური ძალების დისლოკაციის შეცვლის გეგმა, მათ შორის კოლექტიური ძალების გაერთიანებული შტაბის, მათი ქვეგანაყოფების დისლოკაციის ადგილებზე გადატანა, აგრეთვე, განახორციელონ ლტოლვილებისა და ადგილნაცვალი პირების ორგანიზებულ დაბრუნებასთან დაკავშირებული სხვა ღონისძიებანი, უწინარეს ყოვლისა, გალის რაიონში (ძველ საზღვრებში).

მშვიდობის შენარჩუნების კოლექტიური ძალების სარდლობამ გააძლიეროს ყურადღება მშვიდობის შენარჩუნების კოლექტიური ძალების მანდატის შესაბამისად უშიშროების ზონაში მდებარე სარსებო მნიშვნელობის ობიექტების, კერძოდ, ენგურჰესის, ხიდების, წყალმომარაგების სისტემის და ა. შ. უსაფრთხო ფუნქციონირების უზრუნველსაყოფად.

4. გამოთქვამს ღრმა სინანულს იმის გამო, რომ თანამეგობრობის სახელმწიფოების მეთაურთა საბჭოს 1997 წლის 28 მარტის გადაწყვეტილების ნაწილი, რომელიც უშიშროების ზონის გაფართოებას ეხება, არ შესრულდა.

მოუწოდებს აფხაზეთის მხარეს კვლავ დაუბრუნდეს ამ საკითხს, განიხილოს და დადებითად გადაწყვიტოს იგი.

იმ შემთხვევაში, თუ დაბრკოლდება ლტოლვილთა დაბრუნება, საფრთხე შეექმნება მშვიდობასა და უშიშროებას რეგიონში, განიხილოს საკითხი, რომ შესაბამისი ცვლილებები შეიტანონ სამშვიდობო ოპერაციის ხასიათსა და შინაარსში ასეთ შემთხვევებში გაეროს წესდებით გათვალისწინებულ ადეკვატურ დებულებათა საფუძველზე.

5. თანამეგობრობის სახელმწიფოთა მეთაურების საბჭო მოუწოდებს დამოუკიდებელ სახელმწიფოთა თანამეგობრობის მონაწილე ქვეყნებს, რომლებმაც ხელი მოაწერეს გადაწყვეტილებებს ქართულ-აფხაზური კონფლიქტის ზონაში მშვიდობის შენარჩუნების კოლექტიური ძალების გამოყენებისა და ქართულ-აფხაზური კონფლიქტის ზონაში მშვიდობის უზრუნველყოფის ოპერაციის განხორციელების მანდატის დამტკიცების შესახებ, უფრო აქტიური მონაწილეობა მიიღონ სამშვიდობო ოპერაციაში რუსეთის ფედერაციასთან ერთად, რომელსაც ამჟამად ამ ოპერაციის მთელი სიმძიმე აკისრია.

6. მიაღწიოს, მსოფლიო თანამეგობრობისა და საერთაშორისო ორგანიზაციის მიერ კონფლიქტით გამოწვეული მოსახლეობის სოციალურ-ეკონომიკური და ჰუმანიტარული პრობლემების გადაჭრის ხელშეწყობას.

7. საჭიროდ მიიჩნიოს მიმართოს გაეროს, რომ საქართველოში გაეროს მეთვალყურეობის მისიის შემადგენლობაში შეიყვანონ თანამეგობრობის მონაწილე სახელმწიფოების წარმომადგენელ მეთვალყურეთა ჯგუფი.

8. დაავალოს დამოუკიდებელ სახელმწიფოთა თანამეგობრობის აღმასრულებელ სამდივნოს, თანამეგობრობის მონაწილე სახელმწიფოთა სამხედრო თანამშრომლობის კოორდინაციის შტაბის მონაწილეობით, სისტემატურად მოახსენოს თანამეგობრობის სახელმწიფოთა მეთაურებს, თუ როგორ

სრულდება თანამეგობრობის სახელმწიფოთა მეთაურების საბჭოს გადაწყვეტილებანი აფხაზეთის, საქართველო, კონფლიქტის მოწესრიგების შესახებ.

9. აცნობოს გაეროს უშიშროების საბჭოს თანამეგობრობის სახელმწიფოთა მეთაურების საბჭოს ეს გადაწყვეტილება.

ეს გადაწყვეტილება ძალაში შედის ხელისმოწერის დღიდან.

ეს დოკუმენტი ხელმოწერილია დამოუკიდებელ სახელმწიფოთა თანამეგობრობის ქვეყნების მეთაურთა გამოკითხვის წესით.

გადაწყვეტილებას ხელი არ მოაწერეს ბელარუსის რესპუბლიკამ, მოლდოვას რესპუბლიკამ, თურქმენეთმა, უკრაინამ, ტაჯიკეთმა.

მოსკოვი, 1998 წლის 28 აპრილი.

(გაზეთი "საქართველოს რესპუბლიკა", #103, 1998 წლის 2 მაისი;www.un.org/russian)